

**ՀՀ ՓԱՍՏԱԲԱՆՆԵՐԻ ՊԱԼԱՏԻ ՆԱԽԱԳԱՀ ՍԻՄՈՆ ԲԱԲԱՅԱՆԻ ԱՄԱՆՈՐՅԱ ՈՒՂԵՐՁ**

01.01.2023 10:10



Հարգելի՛ հայրենակիցներ,

Փաստաբանական ինստիտուտի ներկայացուցիչներ,

2022 թվականը մոտենում է ավարտին և շուտով բոլորս կբացենք մեր տարեգրության նոր էջը: Անցնող տարին լի էր փորձություններով և մարտահրավերներով, այն մեր երկրի համար ևս մեկ դժվարին ժամանակաշրջան էր:

Ցավոք, Հայաստանի և Արցախի շուրջ ստեղծված փոթորիկները դեռ չեն հանդարտվել: Մենք մուտք ենք գործում 2023 թվական, առջևում տոնական օրեր են, սակայն Արցախի Հանրապետության մեր հայրենակիցները և գործընկերները այս օրերին շարունակում են ապրել շրջափակման և թշնամու կողմից գերլարված մթնոլորտում:

Հատկանշական է նաև այն, որ վերջին տարիները մատնանշվում են մեր սահմանների վրա լարվածության շարունակական աճով: Սա այն իրականությունն է, որի մեջ մենք ապրում ենք: Լիահույս եմ, որ գալիք տարին կնշանավորվի մեր միասնականությամբ և պատվախնդրությամբ՝ ընդգծելով այն հերոսական ու փառահեղ ուղին, որով անցել են մեր հերոս տղաները՝ հայրենիքի համար իրենց կյանքը զոհելով:

Բռունցքվելով և միահամուռ ուժերով մենք կկարողանանք դուրս բերել Հայաստանը և Արցախը ստեղծված իրավիճակից: 2022 թվականի ընթացքում, Փաստաբանների պալատը աշխատում էր ադրբեջանական հանցավոր գործողությունները միջազգային հարթակներում բարձրաձայնելու ուղղությամբ: Մեր կողմից տարված աշխատանքների արդյունքում Ֆրանսիայի փաստաբանների միությունների խորհուրդը և տարբեր քաղաքների փաստաբանների միությունները դատապարտեցին Ադրբեջանի կողմից իրականացվող ագրեսիան:

Իմ խորին շնորհակալությունն եմ հայտնում մեր միջազգային գործընկերներին՝ մշտապես ՀՀ փաստաբանների պալատի և հայ ժողովրդի կողքին լինելու համար:

Փաստաբանական համայնքի համար ևս այս տարին հագեցած էր մարտահրավերներով:

Փաստաբանության մասին օրենքում տեղի ունեցան

մի շարք փոփոխություններ, կայացավ ընդհանուր ժողով, որի արդյունքում Փաստաբանների պալատում ստեղծվեց նոր մարմին՝ Կարգապահական հանձնաժողով, հաստատվեցին Փաստաբանների պալատի կանոնադրության և Փաստաբանի վարքագծի կանոնագրքի նոր փոփոխությունները:

2022 թվականի ընթացքում Փաստաբանների պալատում իրականացվեցին մի շարք ծրագրեր՝ այդ թվում միջազգային համաժողով, որի ընթացքում ՀՀ փաստաբանների պալատի հարկի տակ էին հավաքվել մեր միջազգային բազմաթիվ գործընկերներ՝ Ռուսաստանից, Ֆրանսիայից, Ղազախստանից և Վրաստանից:

Անցնող տարվա ընթացքում կնքվեցին մի շարք հուշագրեր և համաձայնագրեր, որոնք ազդարարում են իրականացվելիք նոր ծրագրերի մեկնարկը:

Սիրելի գործընկերներ,

Իմ շնորհակալությունն եմ հայտնում ՀՀ փաստաբանների պալատի յուրաքանչյուր փաստաբանի և աշխատակցի՝ ի նպաստ փաստաբանական ինստիտուտի կատարված յուրաքանչյուր արդյունավետ քայլի, մեր ինստիտուտի հեղինակության բարձրացմանը նպաստելու և սրտացավ աշխատանքի համար:

Մեկ անգամ ևս շնորհավորելով բոլորիս գալիք տարին, մաղթում եմ արժանապատիվ խաղաղության, նոր ձեռքբերումների և բարի գործերի իրականացման տարի:

Շնորհավոր Ամանոր և Սուրբ Ծնունդ:

ՀՀ Փաստաբանների պալատի նախագահ  
Սիմոն Բաբայան

```
Վերադառնալ $(window).load(function(){ if(typeof $(".fb_comments_count").html() != "undefined" && parseInt($(".fb_comments_count").html()) != 0){ updateCommentsCount(window.location.href); } })
```